


適園叢書

張宗祥



通國書

張氏



求是齋碑跋卷三

武進丁紹基

唐

成德軍節度使李寶臣紀功頌

俗名風動碑在直隸正定府城內大公館

永泰二年七月

王佑撰

王士則書并篆額

通鑑二百三十七元和四年王承宗叔父士則以承宗
擅自立恐禍及宗與幕客劉棲楚俱自歸京師詔以士
則爲神策大將軍案元和四年上距大歷元年凡四十
四年永泰二年寶卽大歷元年則士則書此碑時不過
二十餘歲也

李寶臣斷碑

在直隸正定府署內

無年月

正書

邑教諭趙文濂新修正定府志稿云此碑已鑿爲石槽
埋土中咸豐間啟土得之郡守徐鏞移置郡廨

案是碑僅存上半截書撰人名氏及立碑歲月俱無可
攷碑首行題大唐成德七州節度觀察處置等使下
缺次行金紫光祿大夫門下下缺當係撰碑人繫銜第
三行上柱國齊國公王縉下缺當係書丹二字碑文首
二行亦剝泐不可辨可識者寶臣字爲輔世居柳城曾
祖素皇左驍尉大將軍爲名將張瑱高所重以致遠期
之考唐書本傳李寶臣字爲輔范陽張瑱高畜爲假子
故冒其姓名忠志據此則此碑似此稱述寶臣者惜不
得撰者姓名幸王縉二字猶顯然可見考唐書李懷仙

傳大歷三年爲其麾下兵馬使所殺希彩自稱留後恆

州節度使張忠志

卽寶臣本名

以懷仙世舊無辜覆族遣將

率眾討之爲希彩所敗朝廷不獲已宥之以河南副元

帥黃門侍郎同平章事王縉爲幽州節度使詔縉赴鎮

希彩聞縉之來蒐選卒伍大陳戎備以逆之縉晏然建

旌節而希彩迎謁甚恭縉知終不可制勞軍旬日而還

則縉書此碑當在大歷三年往還幽州時道出鎮州與

寶臣兵事交涉而爲書此碑以示結納未可知也又攷

寶泉述書賦注王維字摩詰弟太原少尹縉文筆泉藪

蓋唐詩避高祖諱故改作泉藪耳

善草隸書功超薛稷二公

謂維與縉

名望

首冠一時時議論詩則曰王維崔顥論筆則曰王縉李

邕祖詠張說不得預焉又盧氏雜記云王縉好與人作
碑銘有送潤毫者誤叩其兄門維曰大作家在那邊此
王縉素善碑版之證此碑或亦因寶臣潤筆而爲之書
丹歟光緒七年九月初二日陳翊雲主簿由正定寄贈
此碑因加考證於左汀鷺識

華嶽廟蘇敦兄弟題名

裝本在華嶽精享昭應
碑側在陝西華陰縣

大歷五年六月 正書

通鑑唐紀天寶十四載三月辛巳命給事中裴士淹宣
慰河北

關中金石記寰宇訪碑錄既載有裴士淹題名又載此
碑今案碑文是蘇敦兄弟送裴之出過廟題名而無士

淹名抑裴士淹題名別有一碑耶關中金石記云宰相
世系表蘇氏河南尹震有七子敦發教徹墩政儼此云
汝州司馬敦弟華陰縣令發弟咸陽縣主簿敦弟前華
原縣丞徹弟太常寺主簿敞弟吏部常選墩弟少府監
主簿教弟儼不同者墩疑卽是墩有敦不應復有墩也
政疑卽是敞字形相近此等要當以碑爲正

韋綬等華嶽廟題名

裝本在華嶽精享昭應碑
之後在陝西華陰縣

德宗貞元元年二月六日 行書

題曰華陰縣令韋綬檢校水部員外郎崔頴華州司功
參軍鄭齊躬貞元元年二月六日記

寰宇訪碑錄題作華嶽廟崔頴鄭齊躬等題名關中金

石記題作韋綬等題名云唐書韋綬傳綬字子章京兆
萬年人建中中爲長安尉朱泚亂羸服走奉天拜華陰
令案唐有兩韋綬一爲韋貫之兄非此人

通鑑二百四十九元和十一年諫議大夫韋綬兼太子
侍讀每以珍膳餉太子又悅太子以諧謔上聞之丁未
罷綬侍讀尋出爲虔州刺史綬京兆人

華州下邽縣丞韋公夫人墓志

在陝西長安

貞元六年二月 子縝撰并書

案夫人卽下元和十五年韋端元堂誌韋端之室惟元

堂誌云嗣子縝

卽撰此墓誌者

洎系練紆絢

北嶽廟題名石幢有易定觀察使韋

絢題名係懿宗咸通六年二月廿九日則絢於咸通時曾官易定觀察使而元堂誌絢爲端第五子繫銜云前

太廟齋郎蓋絢由太廟齋郎遷觀察使也此誌則云有子五人曰縝與元堂誌合

曰潔不與元堂誌合曰系與元堂誌合曰縝不與元堂誌合曰紓與元堂誌合而無練絢名

豈縝後改名練而潔後改名絢歟以元堂誌之次似練居第三紓居四而絢居五此誌之次似又潔居第二系居第三縝四紓五豈行文不以少長行次而任意列名歟殊不可曉也

三世像贊

貞元六年五月 許琳撰 高述行書

按贊爲成德軍節度押衙張孝義作孝義爲符陽郡王孝忠之弟考孝忠曾官易州刺史今易州有張公山亭再葺記係建中二年王璿撰又曲陽縣北嶽府君碑陰

有元和三年義武支度副使高述題名今此贊高述繫
銜曰節度支度判官朝散大夫檢校尚書虞部郎中兼
侍御史當卽一人此碑似亦應在今易州境內而金石
家俱未著錄豈近日始出土歟光緒十三年長至後二
日紹基跋於邢臺官舍

又按舊唐書張孝忠本傳其弟孝義及孝忠三女已適
人在恆州者悉爲惟岳所害今合之此贊孝義列銜是
孝義爲成德軍節度押衙始終在李寶臣父子帳下致
爲惟岳所害則此像贊當亦刻於恆州應在今正定府
城惜無從物色也光緒十五年正月初六日紹基又識

北平縣夫子廟碑側記

貞元十年

戊申

九月

陽象初記

行書

是刻金石家俱未著錄記文有云豐碑立於隋仁壽清
廟移於唐建中蓋卜勝以易地而古碑獨存乎故處迄
於今貞元十年在藩之右汙沒者過半馳本逐末
歲星周天嗟乎微言幾至泯絕逮我朝請大夫守易州
長史權知北平縣事李公曰承訓卽崑玉一片詞河九
流獨負藝能乃庀方邑郵淹滯感遺碑精誠通神遷
就靈廟洗滌篆素增修孔門真容煥然虔敬如在又曰
夫子之睿哲聰明固冥加於李君奕代矣時閏茂歲
九月哉生魄處士陽象初記末後題名有承張訖主簿
鮮于平刷柳字詳修等字攷唐北平縣今爲保定府

完縣文廟有隋仁壽元年北平令寇文約修孔子廟碑
猶歸然獨存詳按記文豐碑立於隋仁壽清廟移於唐
建中似至唐德宗建中時廟遷而碑仍在故處及貞元
十年李承訓權知縣事移碑就廟而陽象初爲之記疑
卽刻於隋碑之側惜不獲至完縣一諦視之光緒十四
年六月廿三日紹基識於邢臺縣署

趙之謙補寰宇訪碑錄題作李承訓移碑記云在直隸
完縣隋孔廟碑側

同州澄城縣鄭公德政碑

金石萃編題作鄭楚相德政碑

貞元十四年 陳京撰 鄭雲達行書 姜元素篆額

雍州金石記云今在本縣南門鄭公祠內

貞元元年陳京疏爭盧杞不可

通鑑唐紀四十三建中二年陳京等建議以爲貨利所聚皆在富商請括富商錢以供軍計京叔明之五世孫也胡注陳叔明陳宣帝子封宜都王又盧龍節度行軍司馬蔡廷玉惡判官鄭雲逵奏貶鄭州參軍雲逵妻朱滔之女也滔復奏爲掌書記雲逵深搆廷玉於滔滔行至宗城掌書記鄭雲逵參謀田景仙棄滔來降

洛州刺史盧瑱等題名

無年月 正書

謹按宋歐陽文忠公撰集古錄有唐盧瑱禱聰明山記元利二年跋云右禱聰明山記盧瑱撰乃盧從史禱山

神之記也閱從史官屬題名見孔戡與烏重胤俱列於後而感韓退之記戡事云戡屢諫從史不聽卒爲重胤所縛掩卷太息者久之嗚呼禍福成敗之理甚明而先事則罕見從事至而言則不及矣自古敗亂之國未始不如此也又公子叔弼跋云洛州刺史盧瑱撰不著書人名氏昭義軍節度使盧從史禱於聰明山祠作此記從史并官屬題名於後以元和二年七月立今記文無序僅此題名在廣平府臨洛關趙廿二年婁山石刻之右而所有盧從史及孔戡烏重胤諸人名俱不見僅餘軍封官濟陰郁久閭侍御史魯國郝士美及洛州刺史范陽盧瑱三人題名耳光緒十七年正月二十日紹

基識

又按白香山贈楊巨源詩注云楊嘗有詩贈盧洺州云
三刀夢益州一箭取遼城由是知名盧洺州蓋卽頊也
竇叔向碑

元和三年十月 羊士諤撰 竇易直正書

通鑑二百三十六順宗永貞元年六月貶宣歙巡官羊
士諤爲汀州寧化尉士諤以公事至長安遇王叔文用
事公言其非叔文惡之怒欲下詔斬之執誼不可則令
杖殺之執誼又以爲不可遂貶焉

通鑑二百四十二長慶二年浙西觀察使京北竇易直
奏大將王國清作亂

河東節度北都留守成紀郡王范

等題名

在直隸曲陽縣縣治儀門

外東首

考碑年月俱泐而成紀郡王下隱約似范字繫銜與張嘉貞北嶽恆山祠碑之陰范希朝題名正同考宋陳思寶刻叢編有唐范希朝謁北嶽廟記引集古錄云元和五年河東節度使范希朝討鎮州過北嶽廟題記又趙氏金石錄有唐成紀王祭北嶽碑元和五年李穆撰令狐靖正書余於光緒七年承曲陽于鑑堂大令招往襄校試藝徧訪縣治碑碣既得東魏邸珍碑而於范希朝北嶽碣則徧求不獲最後得縣治儀門外一碑白石素質碑面刻崔仲子閱世藥言後刻明天啟元年知爲明

時人所刻而碑陰隱隱有河東節度使等字心知爲唐碑亟摩挲諦視與張嘉貞北嶽恆山祠碑陰范希朝題名繫銜適合疑卽范碑彼碑題名系元和五年二月六日則此碑當與同時故編隸於此未知有當否也紹基附識

通鑑二百三十七元和四年河東節度使嚴綬在鎮九年軍政補署一出監軍李輔光綬拱手而已裴垍具奏其狀請以李鄘代之三月乙酉以綬爲左僕射以鳳翔節度李鄘爲河東節度使是年靈鹽節度使范希朝奏以太原兵百人衣糧給沙陀許之元和四年六月以靈鹽節度使范希朝爲河東節度使朝議以沙陀在靈